

禮部志稿

欽定四庫全書

禮部志稿卷十三

明
余汝楫 編

儀制司職掌

耕藉 西苑耕歛附

皇祖重農元年仲春即行耕田禮列聖相承皆遵用
焉至肅皇復行西苑耕歛之禮立帝社稷壇以春秋
祈報禮加詳已今西苑禮不行

洪武二年定 皇帝祀先農畢太常卿奏請詣耕藉位皇
帝至位南向立三公以下及應從耕者各就耕位戶部
尚書北面進耜太常卿導引皇帝秉耒三推戶部尚
書跪受耒太常卿奏請復位南面坐三公五推尚書九
推各退就位太常卿奏禮畢太常卿導引皇帝還大次
應天府尹及上元江寧兩縣令率庶人終畝是日宴勞
百官耆宿於壇所

永樂間續定 凡祭先農畢駕至耕田所戶部尚書捧

鞭跪進教坊司官率其屬作樂隨駕行三推禮畢駕至
儀門陞座樂作觀三公九卿耕訖教坊司承應用大樂
百戲畢跪奏致語駕至殿內陞座進湯進膳俱用樂畢
順天府官率耆老人等謝恩樂作禮畢樂止次百官行

禮樂作禮畢樂止賜百官酒飯百官復入班行禮樂作
禮畢樂止尚膳官進膳樂作進訖樂止百官入席教坊
司官奏一奏本太初之曲進酒樂作進訖樂止進膳樂
作進訖樂止教坊司官跪奏進湯樂作徹湯樂止二奏

仰大明之曲進酒進膳進湯如前儀三奏民初生之曲
進酒進膳進湯如前儀徹御案畢樂止百官復入班行
禮樂作禮畢樂止鴻臚寺官奏禮畢駕還

嘉靖九年續定 每歲仲春上戊祭社稷及先農先二
日早順天府官以耒耜及種蒔種進呈少頃內官捧耒
耜及種蒔種授順天府官捧由午門左門出置綵輿中
鼓樂送至耤田所至日祭社稷畢昧爽上具翼善冠黃
袍御奉天門太常寺官奏請詣先農壇上陞輦鹵簿導

從詣壇所具服殿更衣致祭

儀具祠祭司

祭畢上還具服殿

更翼善冠黃袍少憩百官易便服訖太常卿入奏請詣
耕藉位導駕官同太常卿導引上至耕藉位南向立三
公以下從耕者各就耕位戶部尚書北向跪進耜順
天府官北向跪進鞭導駕官同太常卿導引教坊司官
率屬作樂歌舞左右贊相上秉耒三推訖戶部尚書跪
受耒耜順天府官跪受鞭太常卿奏請復位順天府尹
捧青箱隨以種播而覆之上御觀耕臺觀三公五推尚

書九卿九推訖太常卿奏耕畢從耕官各就班導駕官同太常卿導引上詣齋宮鴻臚寺官俟上陞座奏從耕陪祭官叩頭奏順天府縣官老人叩頭訖順天府率庶人終畝鴻臚寺官贊入班百官序列定致詞云親耕既成禮當慶賀贊五拜三叩頭禮畢賜百官酒飯鴻臚寺官承旨贊入班百官行一拜三叩頭禮訖尚膳監進膳三品以上官各就殿臺四品以下官臺下御路傍東西相向各賜坐并宴勞耆宿于壇傍教坊司承應用大樂

隊舞村田樂雜戲跪奏致語進酒進湯進膳及百官行
禮俱奏樂如常儀宴畢鴻臚寺官贊入班百官行一拜
三叩頭禮訖駕興還宮

隆慶二年耕藉儀同先期一日預告奉先殿是日還宮
仍詣奉先殿及弘希神霄等殿參謁

弘治元年奏准順天府率兩縣官耆老謝恩之後引上
中下等農夫各十人穿着本等衣鞋各執農家器具朝
見叩頭令其終畝畢人賜布一疋

嘉靖九年令以藉田舊地六頃三十五畝九分六釐五毫撥與壇丁耕種歲出黍稷稻粱芹韭等項餘地四頃八十七畝六分二釐九毫除建神祇壇外其餘九十四畝二分五釐六絲四忽亦撥與壇丁耕種上納子粒俱輸於南郊神廩以供大祭等項梁盛十年戶部題准藉田五穀種子每畝合用一斗本部發銀行順天府收買送用以後年分子收穫數內照地存留備用合用農器犁四張耜四張鍬十把鋤十把楸十把扒十把杈十把

鐮刀十把掃帚十把簑笠十副礮礮四箇大小麻繩共
一百條筐擔十副禮部發銀順天府買造每地一頃合
用耕牛四隻禮部發銀順天府收買每日草料行裏牛
房照數放支責付耕夫餵養每地一頃用夫十名行順
天府於宛大二縣取用俱免本身差役仍行太倉每名
支口糧五斗

西苑耕歛

嘉靖十年上命墾西苑內隙地為田諭禮工二部建帝

社帝稷壇每歲仲春秋行祈報禮

儀注見祠祭司

于壇東北建

殿曰無逸亭曰豳風又建亭曰省耕曰省斂每歲耕獲

上親臨觀以重農事置倉曰恒裕貯田之所入以供祀

事

視學

皇祖視學祭先師不設牲不奏樂憲宗始用牲樂孝

宗加幣與太牢世宗以正先師稱號載視學復增設

啓聖公祠禮更有加云

洪武十五年定 前期一日有司灑掃殿堂設御幄于大成門東上南向設御座于彝倫堂至日學官率諸生迎駕于成賢街左駕至學官及諸生俯伏叩頭興駕入櫺星門止于大成門外上入御幄禮官入奏請具皮弁服次請行禮導引官導上出御幄就御位百官各就位導引官導上詣盥洗位搯圭盥帨出圭詣酒尊所酌酒詣先師神位前再拜百官皆再拜搯圭執事官跪進爵上獻爵授執事官奠于神位前出圭再拜百官皆再拜

四配十哲兩廡分獻如常儀導引官導上入御幄易常服陞興詣學學官率諸生先列于堂下東西上至彛倫堂陞御座贊唱學官諸生行禮五拜叩頭東西序立于堂下三品以上及侍從官以次入堂東西序立贊進講祭酒司業博士助教四人以次陞堂由西門入至堂中贊舉經案于御前禮部官奏請授經于講官祭酒跪受賜講官坐乃以經置講案叩頭就西南隅設几榻坐講賜大臣翰林儒臣坐皆叩頭序坐于東西諸生圍立以

聽講畢祭酒叩頭退就本位司業博士助教各以次進講畢出堂門復位贊唱有制學官諸生列班俱北面跪聽宣諭五拜叩頭禮畢學官率諸生出成賢街跪俟駕還明日祭酒率學官上表謝恩

成化元年續定 前期一日太常寺備祭儀設大成樂器于殿上列樂舞生于階下之東西國子監灑掃殿室內外錦衣衛設御幄于大成門之東上南向設御座于彝倫堂正中鴻臚寺設經案于堂內之左設講案于堂

內之西南至日置經于經案錦衣衛設鹵簿駕教坊司
設大樂俱于午門外是日早百官免朝先詣國子監門
外迎駕分獻陪祀官先詣國子監具祭服伺候行禮駕
從東長安門出鹵簿大樂以次前導樂設而不作太常
寺先陳設祭儀於各神位前設酒尊爵如常儀執事設
上拜位於先師神位前正中是日學官率諸生迎上至
大成門外入御幄禮官入奏請具服上具皮弁服訖奏
請行禮導引官導上出御幄中道詣大成殿陞上典儀

唱執事官各司其事執事官各先斟酒于爵候導上至
拜位贊就位百官亦各就拜位四配十哲分獻官各詣殿
東西階下兩廡分獻官各詣廡前俱北向立贊迎神樂
作樂止奏上鞠躬拜興拜興平身通贊百官行禮同奏
搢圭上搢圭執事官跪進爵樂作上受爵獻畢復授執
事官奠于神位前樂止奏出圭上出圭四配十哲兩廡
分獻官以次詣神位前奠爵訖仍以次出殿門外東西
向立典儀唱送神樂作樂止奏上鞠躬拜興拜興平身